

守

柔

齋

詩

鈔

蘇賡堂先生守柔齋續集序

高要蘇賡堂先生爲御史時以道光壬寅天變陳言直聲震天下旋以憂去其官咸豐初元奉

詔特起擢工科給事中數有獻納旋又復以憂去

今天子嗣位我兩宮

皇太后垂簾親政一時海內仁賢輻湊徵起先生伏居其鄉已十餘年乃以中外大臣交章薦達朝廷詔書一再敦勉幡然萬里來觀京師卽日得

旨觀察河南先生故以直諫顯而風裁峻整當世識與不識舉稱其當高掌遠蹠裨闔萬有非徒出入風議之才今雖老矣而矍鑠顧盼英偉絕特之氣躍然眉宇未嘗少衰

國家當此艱危共濟需才孔亟之時而先生以諫臣起一
旦輒畀外臺先生奉

詔欣然感激恩遇祇被首塗不少卻顧嘻其壯哉方先生
爲御史拯甬通籍觀政曹司從上元梅先生遊以文字切
劘梅先生論詩尤嚴獨於先生詩亟稱之拯故承先生教
而聞梅先生言亦能心領其意乃時先生自謂中年心疾
於詩殊不肯爲且戒拯以詩之爲道雕鉤肝腎勞精敝神
宜姑置之厥意良厚顧自十餘年來好溺文字所歷身世
悲憂拂鬱之故時發於詩弗能常守先生之教每思昔言
未嘗不中愧也先生之來也一見輒出巨編相示曰此吾
北遊草也昔與子戒勿爲而茲乃自爲之且數爲之子以

爲何拯受讀之蓋自被召而出行程所歷詩百餘篇鄉居
數載時有所作亦附存焉先生詩故早成中歲所作嘗一
刻道光間卽梅先生所嘗見也經歷世變年益進而詩轉
益豪昔人論李商隱詩以謂指事懷忠鬱紆激切可與曲
江老人相視而笑竊於先生亦有謂焉獨是先生先朝名
宿負當時望屏居鄉里久而復出窺其精神涯度之間與
其所爲詩忠義激壯故將大有爲之世必有一時老成宿
望騰揚蹕厲之士出而宏濟於其間此豈先生之志然乎
抑天所以進退先生者有莫知其所以然乎先生精易雅
自矜然則於茲必有覺焉雖以拯之薄劣材散而數奇
自度於世罔足陳效讀先生詩猶將爲之感慨奮發而起

舞也書以贈先生行並序於詩同治二年癸亥十月五日
馬平王拯

守柔齋甲午北遊草卷一

高要蘇廷魁德輔著

受業

蔣達霞勛全校

高堂別

白髮勸離杯離懷強撥開平安行萬里到處寄書同

雞鳴發水口同愚谷

爲戀長溪樹初程緩到今庭闈中夜夢風雪遠遊心舊侶孤舟共荒年百計侵向來搖落意此去莫虛吟

峽山寺作

北江三峽俱靈奇獨有中宿留坡詩蓬萊小謫復歸去帝子不語袁孌悲山空水逝幾歲月十四年前與山別一片閒雲款客來俯窺疑碧心源澈仙佛遺跡空傳訛石泉琴

筑清音多老僧未肯忘鄉井猶憶香茶問斧柯

秀上人俗家斧柯山下

英石

英州百里山無肉湏水年年盪山腹春生秋壯波有稜混
沌竅開釀雲絲不知造物逞神巧散置蠻荒媚誰目石從
山孕火爲精子得母形怪成族龍前虎後向天闕馬嘶牛
眠戲林谷九成逸響半空傳五嶽分圖一拳縮雨連大嶺
滴深翠月出滄溟照羣玉扁舟遠溯歲將暮日短風高行
不速蓬窗展眺攬奇秀掩映疎松間修竹豈無大力一輦
致豪貴園亭未爲福太湖破碎入綱船良嶽蒼涼見沈陸
仙城九曜鬱光彩肯受降王匠徒辱褐衣懷寶羞自衒頗

惜荆人襲良璞石乎許爾保天年撐拄朱明鎮南服

彈子磯

北來千萬峰氣猛骨稜瘦溱江日夜流奔騰與江鬪茲峰
獨恬退俯息江之右祝融揮長劍一削落衆皺碎石激水
飛脫手彈丸走空明珠有類黝黑鐵無繡潛游困魚鼈下
飲駭猿狖南船逆風至雨雹喧白晝絕壁不可階想像天
門叩何年散仙戲懸崖啟虛竇遂令此邦人浪說竒符寇
山靈好看客爲洗千年臭

磯旁石壁俗傳黃巢試彈處

夜興

酒醒寒衾薄灘聲繞枕流始知身是客風雨宿孤舟

寄內

浮雲夫壻別離多霖雨蒼生竟若何直爲一家溫飽計此
身輕易涉風波

別來幾日隔千山行路方知望遠難莫使高堂添白髮憑
君晨夕勸加餐

太平關感事

鼓角聲沈桂水寒九成臺暗夜漫漫客船一報玻璃稅從
此江湖穩泊難關吏包攬鴉片煙隱名玻瓈稅匪徒藉搜煙以行劫矣

度嶺作

天邊回雁響蕭騷地接衡陽勢自豪南谷全開唐道路北
關頻送漢旌旄梅經雪後猶含暖身入雲中不覺高丞相
祠前望鄉處萬松如海捲蒼濤

發南安

輕舸下南安山迴送急湍數家深竹裏歲暮不知寒

橫浦詞

故鄉日以遠童僕孤舟語昨日嶺頭梅今朝橫浦雨

食冬筍

遊子聚糧時膳羞失馨潔食筍不知甜中有孝子血

鷓鴣

短筏迎寒雨長繩曳晚風水清魚去盡閒殺信天翁

芙蓉渡

不見楊柳溪但見芙蓉渡一夜水車聲斷儂夢中路

南康小泊

江似九迴腸東流又一方環城山盡赤帶雨水纔黃比歲
稽奔盜浮言議救荒考亭遺澤在糴米入南康城內米價最賤舟過此必買米數石

和愚谷

五十四年窮不死世間乃有陳夫子絕糧三日不言飢一
卷楞嚴瀉瓶水貂帽狐裘豪少容宰官身現傳南宗嗟余
未得安心法怕聽寒林古寺鐘

過十八灘

亂石橫江出中流響怒潮一灘成一險三暮復三朝歲晏
行何滯風迴雪乍飄離家三千里客路尙遙遙

廬陵懷歐陽文忠公

水論童年習思從六一遊釐文開兩宋得士足千秋縱有
先生在何堪後死求頻來風雪裏飄泊見沙鷗

凌波渡

曉色淨娟娟波光漾遠天驚鴻宜照影拾翠自何年昨夜
臨溪夢看梅倚鏡前此江非不好客思獨茫然

過吉安懷王文成

一舉擒吳淝奇功不在兵憂時防未雨仗義奮先聲賊膽
洪都破臣心贛水清龍場韜晦日誰惜此書生

登滕王閣寄春洲

積雪滿長洲來尋帝子遊幾人詞賦在一水古今流吳楚
連青雀風潮起白鷗客心同浩蕩斗憶閔江樓

吾郡惟此樓最勝

三宿曾留夢重來異少年不逢文字飲又結水萍緣樓觀
藏蛟地關山泊雁天西園方臥雪梅格得春先

舟晚

日落湖光冷漁歌動遠愁緝私官艇過警盜客帆收俗猾
欺疏網途長感敝裘漢廷鹽鐵論誰與大夫謀

鯉魚灣

鯉魚灣外鯉魚多漁艇鳴榔夜半歌生長江湖魚作飯不
知何處有風波

尺素題書欲寄難西江南海路漫漫津頭一夜鯉風急似

有神龍臥歲寒

地近龍津

江曉

江曉寒於夜林垌一片霜曉鴉催客起今日又何鄉

贈南風

舟人謂歲杪南風爲送年風

帆迎夕照水花紅似水年光日向東
同望天南心欲折計程應話送年風

安仁縣謁宋將軍張孝忠公祠

將軍淮人宋末從軍拒元兵守臣降元將

軍率鄉中勇士轉戰脫走歸謝疊山先生同守安仁授帳前都點檢嬰城殉節廟宇壯麗甲於全城廟前有血戰團湖圖生氣凜凜將軍不愧其名邦人亦不負將軍也

白雁挾隊飛錢塘六宮北徙天雨霜
厓門旅泊一杯土安

仁下邑倡勤王謝公儒臣氣如虎
招集熊罷殺狐鼠將軍

奮臂江淮來羶帳如雲戈撥開團湖酣戰震天地
金甲恍

從永昌至赴海難招少帝魂死綬但識將軍義
免胄嬰鋒

作鬼雄同來子弟身効忠趙家養士三百載時危草莽多

英風嶺南亦有馬將軍

名南寶

破家赴難稱完人當時將相

草間活羨爾血食輝千春毅魄光光呼欲起濠上布衣作

天子大漠流離帖木兒興亡一轍如流水玉真山畔朔風

寒颯巡靈旗擁血鞍宋室孤臣全大節

謂疊山先生

九原曾不

負同官

除夕泊金沙渡

石鼓山前水驛長金沙渡口夜蒼涼同舟且喜論前事

譚同

年招飲

餞歲還如別故鄉雲罅疎星牛女見波間脩竹鳳鸞

翔遙憐弟妹承歡宴爲祝平安憶雁行

貴溪舟次

吉語聞舟子官程到貴溪望雲梅嶺外迎歲豫章西山勞
千熊臥灘轉馬嘶高樓斜照裏尊酒待誰攜

封禁山

山故盜藪久封閉也

信州山多奇鬼谷有遺跡神仙不到處莫惱聚成國獨
城市通捷若猿猴擲高閭當礙眉方石未容蹠一語輒
爭百夫爲辟易羈縻禮法絕此輩安可測陰陽入洪爐鑄
就千仞赤青青太古樹葉落掩山色梯空作平地尋踵不
著壁近閭耕作勤頗給逋逃食化外足逍遙慎勿識兵革
八排用師後粵土今歎息

愚谷夢異人贈詩及余

雲中招手歛飛仙閬闔朝回醉不眠行過羅浮百花發折

花因問孝廉船

許旌陽廟

仙家何事覓刀圭
濟物功多天壽齊
不見旌陽慈父母
至今祠廟遍江西

題張中丞廟壁

一片忠肝百鍊身
賦詩殺賊見精神
平陽圍解睢陽死
河北江東兩異人

弋陽寫望

春雲一抹萬峯齊
野鶴高飛欲擇棲
颯颯東風舟緩緩
看山已過弋陽溪

老虎灘

水如玉龍跳石作金虎伏水石不相讓龍虎互摧軋適從
河口來輕帆獵春綠風雲忽然合聲勢麤鉅鹿長年語其
曹負客遽登陸迴身挽長纜尻高浪花觸險處輒齊力哀
號虎蹴移疊未得上肘行沙貼腹去年方南歸漲潦蒸
暑溽及此快乘風隨流枕飛瀑眈眈一轉眼似怪往來熟
安得仙人鞭徒汝傍鬼谷

人日登信州城樓

今日是何日登樓宜遠人屏開千嶂曉橋鏤半江春菜把
能成市梅花不擇鄰故園羣從飲懷客得詩新

和愚谷憶內

詩興花香不礙禪維摩一室伴嬋娟探梅瞥見靈溪女獨

向春風憶少年

與愚谷談易

飽閱風霜意氣平
長林迢遞早春聲
夜談恐擾江鷗夢
坐對波心看月明

黃巖山

石作霞標草木稀
浮圖一握挂斜暉
眞仙不識何官府
小住人間有是非

度玉山至常山途中雜詠

菜花黃遍麥抽青
細雨人過務本亭
見說日間夫價貴
山田開種集男丁

石龍橋下水聲寒
冰玉樓前石碣殘
彌勒一龕燈一粟
不

知過去是何官

郵亭十里幾人家少婦當爐綰鬢鴉酒味不如茶味好後
堂留客看茶花

青山真箇礙爲塵過客多於山上雲百里不知天險在屏
風關外玉常分

屏風關爲
兩邑分界

題嚴先生祠堂

名在客星中雲臺事不同微言參李耳高韻契梅翁山水
身如寄君臣志已通南陽龍戰罷何處弋冥鴻

和愚谷錢塘雜詠

欲攬餘杭勝江花儘泥人煙疑鳳山暮月照虎林春詩思
隨潮遠歌聲對酒新銷金應有地莫弔宋君臣

簾捲春風入嫣然見早梅眼波金縷掩心孔玉簫開自按
周郎曲誰憐小杜才汾江仙夢斷良夜詠悠哉

愚谷自歌其汾江體

冒雪遊虎邱寺

曉踏山塘雪凌寒上虎邱天低孤塔隱人靜百靈遊香界
聞花氣禪心對石頭十年鴻迹在高詠仰蘇樓

五人墓

委鬼昏天燄孤忠血變青五人留俠骨香接白蓮涇

白蓮涇周

忠介葬處地近山塘

蔡忠恪祠

在虎邱

黨禍移明造中丞志獨清童年知聖學老輩慕陽明在日

羣才託聞風一死輕一姜祠宇近海湧共崢嶸

虎邱一名海湧峰

花莊書壁

鐵榦蒙春雪寒梅表故家牡丹紅豔好可惜是唐花

夢始室

十年伉儷八年分春夢無端逐斷雲新舊一心縑比素也
應深夜憶夫君

小車行

丹陽道中作

乘車如乘馬挺脊支兩膀坐車如坐船耳畔聲涓涓忽逢
石路行礚礚馬踏層冰四蹄落練湖隄上草初綠曉霧濛
濛盪船腹憑虛飽看江北山盡日不知行路難顧我僕夫
語悽惻明朝載米奉親還

遊金山寄春洲

江天漠漠春蓬蓬山頂獨立支長風坡仙一去近千載
耽樓觀今尤雄十年三過感陳迹我頑似被山靈識孤鶴
南飛雁北歸羅浮想見瓊枝碧老僧款客看梅花中冷泉
點松蘿茶遙遙華胄話留帶我生不是峨眉家出山早辨
歸山路昨夢崧臺古榕樹願乞雙魚拜水神致書爲問端
江去

望焦山

綽約名山似水仙翠鬟高擁大江煙驚濤一白春雷動欲
往須乘太乙蓮

渡揚子江

春江蕩春夢帆響度遙天南北三分月金焦兩點煙鳴鼙
疑見怪騎鶴定飛仙泛泛人間世風濤坐渺然

揚州曲和愚谷

隋隄楊柳試春風杜牧詩情婀娜中莫問玉鈎斜畔路華
嚴參透本來空

召伯埭

江左夷吾未易才爲成三窟禍留胎東山絲竹蕭閒甚偏
有甘棠報德來

普哈丁墓

在揚州

華表栖鴉語云是哈丁墓借問震旦鄉何如西土佐

淮陰釣臺

淮水哀王孫鐘室誅大將恩怨兩婦人中間一蕭相

荀蘭陵墓

黃歇安能爲國謀懷王不復小臣羞直教弟子持秦法忍
借詩書報楚讐

劉參軍墓

能傾典午賈南風自古難圖是女戎不信婦言君死酒何
知五馬渡江東

蕭太傅墓

直木偏難作大材帝憐恭顯爲君哀漢家一代尊師傅不
許朱雲請劍來

陰平道中

小雨收塵日影寒
嶧山迢遞送征鞍
晚晴緩度陰平路
一朶紅雲直北看

過滕文公廟

東土臨張日能尊
一代賢聽言成善國
遺祀尙公田廟旁有祀
野築袁鵠宅村爭飲馬錢
黃塵逼昏暮懷古意茫然

謁孟廟

古栢森森鬱暮煙
門牆如望泰山巔
丈夫不識三千客
名世須論五百年
歌鳳接輿猶可詔
雕龍炙轂竟無賢
憶從弱冠窺堂廡
幾逐風塵誤著鞭

和壁間許夢得韻

垂楊逗新綠
春思轉悽悽
風力能翻石
沙光不辨隄
飢寒

慰童僕性命託輪蹄同是天涯客挑鐙漫與題

項王墓

八千子弟起江東力氣能成蓋世功
垓下一軍如鉅鹿可應隆準葬重瞳

東阿題壁

駐馬纔觀馬跑泉洗塵仍費酒家錢
縱教子建饒詩興不到柴煙燼火邊

兗州道中

大路渾相失長風一怒號日懸滄海暗
塵與泰山高南北無停軌乾坤有許勞
年來飢渴慣未分伏蓬蒿

夜步

女閭陋夷吾男子學柳下驅車齊魯間沽酒在平夜春月
澹於水中庭浩如瀉孤影共周旋悄待星言駕

花朝早發

百花生日憶今朝花外春山一抹嬌惆悵天南望天北平
沙如海月如潮

題壁

趙女輕澹如春煙歌聲遏月彈三絃停歌欲語面先赤養
孃屢卻天孫錢珠露盈盈點衣綠含酸更唱江南曲雄蜂
雌蝶兩無情莫問燕臺少年叔

早發

點點栖鴉聚棘枝夜啼應戀出巢兒月寒霜白嘶疲馬莫

是高堂夢到時

卷之二

二

守柔齋詩草卷二

高要蘇廷魁德輔著

受業

蔣達霞
梁元桂

全校

丙丁感事四首

丙丁氛祲亘河津
鎮海籌邊氣絕倫
曾使天驕驚赤幟
不煩戎虜破黃巾
樓船自失重洋險
大樹難回五嶺春
往日金陵哀陸帥
若論成敗更無人

朱鳥光泊海
通天晴時雷
電暗時煙
魚鹽邸舍今紛若
燕雀華堂昔晏然
六計如何窮曲逆
百年從此歎伊川
倉皇朝漢臺前月
空仗蜺旌望集仙

盛時寰宇極西東
萬里羈縻掌握中
自入金門天馬賤
翻窺鐵甕火船通
重來豈報彭衙役
五利終歸魏絳功
獨有

蘇東坡集卷二
王能慮遠沿津壁壘列艨艟

東南物力苦彫殘

宵旰憂思九土安
水寨駐防嚴日戒
星關占夜怯霜寒
降龍事渺傳聞異
留虎人疑射殺難
石井江村偕作地
一聲銀管恨無端

夷兵以銀管起號

戊午三月初抵花縣作

雲擁花山大澤陰
雨餘松路馬蹄深
義旗飛應平原牒
哀角驚爲塞下音
昔議徙薪逢客笑
今傳制挺激人心
騎羊五老香煙裏
忍見鯨翻海印沈

海印石在羊城東

江村書憤

天吳助虐與天違
昏瘴連年物候非
閭閻散荔支紅閣
淡橋

餘楊柳綠依稀搏風正合鵬南徙當道翻同鷁退飛無奈
腐儒愁思亂擬吟寒角怨金微趙嚴有降虜詩

漢家

漢家拓地伏戎機利得烏孫置武威神劍未灰炎運厄祁
連成冢將才稀初行買爵民猶崑永禁闌邊國豈非終是
武皇遺略遠匈奴禮遣使臣歸

讀汲黯傳

底葉傷枝繫本根賢良布列一無言呼邪款塞貪中國汲
黯憂時感至尊文法祇求循吏屈雄材能使直臣存朝廷
淮陽守憶對高門淚暗吞

起獨酌

廣院深宵遠夢回
稀微月影送愁來
龍淵挂壁吟何事
勸爾燈前酒一杯

病中吟

簾前飛鳥影東西
兀坐藤牀意若迷
悟到維摩清淨地
翻緣示疾長菩提
拾取花山石亂堆
森然巖洞接平臺
世間幻境無窮變
博得先生一笑來

七月四日作

氣感情生百態新
天倪和處信天均
危言曼衍無邊傲
辯到莊周已絕倫

卉木衰榮只偶然
鵲蚊輕重待誰權
身經再仕成何事
三

釜千鐘不作緣

夢中作

天風吹縹緲荷衣直上終南坐翠微忽悟仙公提耳句曲
江中夜見烏飛

中秋雨坐

四海中秋半苦兵樓臺廢氣隔蓬瀛多年待解青襟子夜
聽樓欄戰雨聲

縱筆二首

毒龍爭穴海揚波多燕求珠奈若何莫倚昌黎驅鱷筆文
人快事古無多

鴻來燕去剎那閤塵事波波不放閒野望欲窮黃葉路蠅

蛩聲聒白雲山

有感

芙蓉木末弄秋光
會耐秋風幾夜涼
青鏡強擡花正好看
花人惜鬢邊霜
珠江波瘴貫銀河
查客傳聞事轉多
我欲掃愁同落葉
秋風無力奈愁何

海鷗

徒聞海鷗辟蛟螭
捉雀驚羣鳳不知
浪湧山摧無定所
欲飛何處亦何爲

八月念九日同龍太常赴惠州宿從化晤梁鎮文光
緒者蘭

國初真將此籌邊玉帳牙旗今不前草澤爭看星使過花
城乍息羽書傳千家擁郭收殘照一水穿城帶暝煙行館
愧逢京邸舊青雲期我在英年

二梁皆老矣
備述往事

望羅浮

行見羅浮夙不期有無緣法百靈知仙蹤那記飛來日佛
跡曾留滅度時南北宗分非任相乾坤氣合若爲資風濤
雲淨看新月華髮飄蕭我是誰

己未二月寄羅龍兩同年

閩江樓下別經春春感叢生岸草新白日當天非濁世青
山終古待閒人鴟音易變林依土蜃氣難消海不臣紅映
雨絲烽火樹花城回首各傷神

花雨一首

濁世才多去復存，信陵殘客慕平原。山川祇任雲流澤，金玉何知主有恩。古態新妝由衆好，浮名厚實竟誰論。春遊欲載聽鶯酒，花雨冥冥且閉門。

憶溪居寄朴仙姪

溪居來往雜漁樵，閒話陰晴暮復朝。時果分嘗童子餉，野筵齊赴熟人招。藤纏病樹當高屋，鷗上空船避急潮。廿年此二句姪愛誦之不涉官程身不老，莊生遊處足逍遙。

春日重憶溪居寄朴仙

昔往今來隔故居，木棉花放燕飛初。祈年酒慶千家社，待渡人喧隻日墟。綠水風光宜笠屐，白頭情態怯簪裾。思量

杜牧英雄語不及蓑翁坐釣魚

戲朴仙

野色山容積雨天扶藜斜度斷橋邊杉松生計留斤斧鶯
燕歡聲竊管絃玉宇微聞天咫語金丹窮取地真篇向師
抱朴知遐覽漫坐溪頭理釣緡

迎春感興

校場茸綠鬧春牛隊擁金獅弄綵毬士女穿花聲隱隱旌
旗颭柳影悠悠暮年絲竹難爲樂南國干戈未斷憂象郡
羊城山海接望雲空憶五層樓

明日作

春去欲愁我春留知爲誰清和初夏日容易夕陽時世事

看珠櫝仙苗養玉芝三山鼇不動太白爾何期

題九老會圖用白樂天原韻

會昌嘉話香山老朱紫登筵盡白鬚三月春光看澹沲七
賢詩興託歡娛後來李叟天年益獨立如師面目麤神肖
霜雕寒欲動舞同風竹勁難扶地餘嵩室游仙跡人半瀛
洲學士圖西角數枝楊柳色承恩得似永豐無

週甲初度辭諸生致餽食物

老憶生初感百端天南盛日兆衣冠山川鬱鬱樽前在歲
月悠悠鏡裏看學未成家徒許國才非經世合休官鄉團
事遠軍儲急玉柱霜螯取醉難

生日示六弟

樂酒天倫事中秋及暇時自餘風木感故與月華辭積德
由來重全生不復疑如逢宣室問何有鬼神知

己未八月生日書懷呈劉太守兼酬省垣諸生

南飛孤鶴遠流音風景蒼涼入感深高峽雲開朝欲霽
湖秋漲晝還陰放歌自續遺山夢勇退誰知若水心六十
韶光去如電此生那復計升沈

廣南形勝握端州鎮靜今稱太守劉

太守督辦西江軍務

鼎石神光

清一水古氓營道肅中秋漫勞小隊殷勤出枉辱嘉魚禮

數優

是日齋食謝客

西路何時息烽警披雲縱目最高樓

一別仙城兩載過簡書重負愧蹉跎碧梧枝老當風易丹

桂花新得月多

太守爲予移植五桂次第作花

願滿應教天不缺愁銷除

是海無波遙傳析木收氛祲擬託浮查問玉河

天育馳驅不乏才脫羈無夢到燕臺未容長孺歸田免錯

比相如論蜀來林下顏顏思昔侶樽前談笑肯空杯七星

於我周旋熟石室寒煙待客開

諸生連致詩軸願來遊故要之

中秋夜懷羊城諸友

西風吹夢落江樓隱隱笙歌古鬱洲明月往時邀客醉飛
仙今夕挾誰遊林腥虎嘯蒼梧野潮怒鯨橫碧海秋吾老
豈無豪俊出聞雞不舞發商謳

再用前韻和鏡洲

不羨元龍共臥樓何堪鸚鵡自名洲才華顯世終無益豪
語方人孰與遊懷抱一開千里月亂離重憶八年秋昨宵

傳到津門捷狂想饒歌逐棹謳

城居

不習林巒隱城居簡往還書無三日別花有四時閒世事
防經手家人伺解顏天津消息隔夜起望星關

夜起一首

雞聲唱歇雁聲來香透簾帷放早梅醒對疏枝空旬線猛
聽殘角恐崔嵬九重已識真卿狀萬里應思定遠才聞道
黑龍江外戍采薇將飲勞還杯

李三兄過談卽事有贈

樗散天全賴不才樂天詩句尙能裁親連中外知婚娶閒
領兒孫熟往來期我巖前清靜室賞梅湖畔兩三杯傾筐

倒履無他客相見平平笑口開

題陸太翁行看子

宦蜀風情鬢未霜閒來把卷愛秋涼歸傳琴韻流端水勝
賣千金使越裝

男兒識字悔東坡報國時須夜枕戈江海瘴深鴻雁遠思
遊錦石寄狂歌

庭中白茶花冒寒初開適閱香山詩題絕句

白傳情憐白牡丹唐昌玉蕊共高寒白茶風韻雖差別正
色都宜冷眼看

天問閣主有殺賊作生日之篇愴然寄贈

寒氣中庭減臨窗放早梅鄉書初日到烽火半年來喜聽

全生話沈思濟世才何時妖賊滅痛飲集松臺

憶西湖游舊

江南春斷不勝哀又聽錢塘警寇來一片西湖綠油水莫
浮殘宋刦餘灰

天公張角久稽誅血灑燐飛無處無沈痛少陵諸將詠俸
錢曾領我非夫

己未歲除效長慶體

紅糴白瘦月盤茶艷映團黃異種花

道署饑歲黃菊最佳

解事長官

娛我老迎年稚子逐人誇城臨江道浮春酒閣奉

天章煥曉霞

石刻康熙宸翰

栢府歸來今九載敢緣憂

國幸居家

李八生日寄贈長句

與君生世共庚申樂數桑榆有幾人羣社近居長利水三
朝及見太平春賞心事往閒能說總角情投老愈親出處
叅商懷玉貴看予鬚髮白如銀

再用前韻酬李八

魚鳥都知志未申鶯花不解老隨人邊防經歲看諸將海
嘯滔天歷四春前代功高周薄伐誰家計拙漢和親共憂
西北軍儲罄蠻市秋毫稅入銀

疊前韻答李八

何時握手語申申楊柳風前淡蕩人肺腑共知平是福林
園幾見閨當春豔陽歌曲花間度古誼通家李氏親卻憶

烏臺餘愧事盤飡叨費海關銀

科道飯食銀由各省關部撥解

客談羅浮東坡先生遊跡

小閣藤牀睡不成瓊樓玉宇意分明
早知富貴同春夢那有神仙享盛名
左股浮來滄海窄一囊持贈白沙輕
雲峰覲面塵容卻空憶蓬萊頂上行

葉提舉以詩敘別次韻贈行

城南波綠柳絲生欲繫春帆緩客行
作宦與詩同灑落持躬如射絕矜爭
風塵將試天駒步林木先知谷鳥情
清白數傳年正壯家聲自振不須盟

庚申上元前酬隼屏惠致水仙花

昨夜春歸宣教堂
息機觀化集三陽
雲絲瞥下淩波影
風

佩翻留滿座香臨鏡雛鬟窺靜逸橫江羽客想翺翔因君
漫引東坡興夢挹林逋配食光

庚申二月二十日紀事

四郊傳警倚樓吟一點偷塵百里陰桂嶺旗翻春色慘

水坑

蓮塘煙息哭聲沈

賊踞蓮塘

園田歸久經多事兵食籌添

折寸心

黃勇告急

憶自橋陵哀痛後海隅憂亂到而今

吳伯蔭觀察枉寄和章推許過情且爲衰庸勸駕媿

負而已奉酬二首

三月牂牁春水生思君恰擬溯江行紅棉表驛驚烽火綠

柳分堤誤羽旌轉粟爲謀鄰子飽算緡須仗長官清

告羅卽蒙

籌備汎舟鄭莊推轂吾何敢器食曾無東道情

正月枉駕郡齋竟缺

遺餽

遂初賦換顏容王事重肩力未供海患幾時驅醜虜軍
儲無策助司農早知鸞鳳能行德將獵豺狼待指蹤君在西省

文武並稱多謝蒼生珍重語開函珠彩照龍鍾

春日村居

不擇幽棲地意隨春鳥閒桃花一樹滿芳草半堤彎斜日
空流水白雲時在山老懷宜野趣長任敝荆關

春感

及時行樂樂何時時似離憂不爲離花笑恰迎黃木杖鵲
飛偏避綠楊枝驚心世路尋常險過眼歡場少壯宜擘石
研丹天質在東皇自結暮年知

春晴登城南樓寄大良諸友

城頭初日春色開桂源萬峰青翠來江聲赴海日千里樹

影飛花時一堆近喜客過頻作餌

賊退後游舊時相見

遠聞軍捷更

銜栢

昨得江北好音

鳳山仙侶如相憶正好讐書老不才

春分寓言二首

春分陰雨暗芳園園閱遊人幾箇存姹紫嫣紅無限恨瞿

曇著眼到花根

百年塵事等風沙舞燕啼鶯家自家誰識悲歡皆法界潯

陽江上聽琵琶

奉寄勞制軍

天威猶震伏波灘旌節東來肅百官經世憂深霜鬢減下

戎策秘赤心殫功成新建時非易事習車師勢亦難二十
年前陪玉署那知炎海漸冰寒

清明已過出郭見紅棉

高閣雖堪倚清樽亦未空萬家兵火後三月夢魂中處處
啼鳩急棲棲乳燕窮忍吞邱壠淚驚見木棉紅

道光庚戌冬余奉 召至京邸於廠肆購得尙直

烈公小印咸豐己未奉 命督辦團練寓端溪

始聞羅定協戎昌懋爲公會孫明年春因明刺史

以印歸之承枉札致謝寄贈四韻

南越初歸化高勳異姓王當時盟帶礪厯世鎮封疆金印

家聲貴銀鈎爵嗣章

印文曰平南王四世孫

珥貂今七葉威望播羅

陽

澤民協戎見示和章復疊前韻酬之

志士安能樂勞臣奮欲飛西江明布令北嶺壯分旂月夜
罷當道花時虎養威萑苻如向化魚鳥亦忘機

酬春洲三月和章贈以蟬硯

年過六十尙風塵名竊師儒媿俸薪玉貌何堪天下士

前被

召大臣論薦以己酉卻夷誤比魯連今讀惠詩益滋顏汗

石交長憶里中人桑榆自

樂非輕世杼柚同憂不爲身雅許知音餐露客望衡清見

兩家親

聞官軍收江北九洑洲金陵賊斷外援尅期可滅喜

成四韻寄順德羅龍兩同年

妖書僞號竊名都欲展龍盤虎踞圖勝國宏光終革命欺
天張角豈權誅石頭軍衆從今合玉樹歌殘視昔殊休望
鍾山祈蔣帝聲靈自有中興符

春洲避難桃溪訪寄此詩

江城花盡客愁新三月流離不見春夢憶西園防枕石魂
驚南岸問垂綸鳳頭何著道逃主鳳頭問四會名鸞翻無
跡今爲賊有傷澹蕩人想藉青蓮五色筆記將塵劫幻兼真

寄陳扶初文學因示舍姪朴仙

十載風塵萬事非君身可稱芰荷衣白蓮初放乘朝霽黃
鳥遲鳴適化機誰賞古音詩百一自憐凡骨道希微吾家
託汝青雲器沙浦避兵歸未歸

試新製研作

書生骨相謝封侯
虛慕長風筆未投
驅鱷掣鯨才仗爾
肯從雷子礪吳鈎

西來綠石貴洮河
輸與端溪得用多
玉局歸閒時事亟
不忘忠義老研磨

閏三月十五日送春同陳輪生

一別一同老三年三處春

前年防夷駐花縣去年省墓歸今年助守郡城無情看

過客多難感勞人萍水風初定秧田雨更新成功由汝退

農事慰駢駢

兵勇已集民始歸耕

五月十六日奉寶月臺

老得蕭閒戀故鄉
朋來清曠宴迴塘
荔支新著杯盤色

舊徐迎叔履香塵世此時渾欲醉禪門往迹已成荒竹林
人數蓬池興曹霸丹青足擅場

謂立齋
參戎

初夏同崑宮保過劉觀察白土水口

雲帆欲挂浪悠悠坐憶劉琨詠在舟高峽風迎旗角轉新
江雨擁塢尖浮爭看老驥輕千里間羨飛鳧寄一漚羣盜
縱橫春事了水邊兵氣冷如秋

賊退後口號

野無烽燧恐行人江有舟帆集要津心與孤花開向曉年
逢閨月老知春竹亭歌鳥聲相和蕉院遊絲態自新馬放
牛歸農事起流亡還定一霑巾

夜涼一首

夜涼庭院月當空有客沈冥清鏡中高樹露華團宿雀疏
籬風響徙鳴蟲靈均憂積天難問太白心迴道未通四海
安危方寸了謾言遺世訪崆峒

春日寫老子書

百花香領早春風道德無爲等化工刑措曾開西漢治經
尊還造盛唐功射蛟江上威無復驅鱷天南力易窮萬一
流沙重演教佳兵偃息奏平戎

寄梁藹傳秀才

南海明珠沒石溪黃明經子高藹傳嘗師之冷光留照半塘西管城垂
老成何用夢獵黃雲詠狄髀

浣花詩爲遣憂多白馬紛紛沸海空書郅支傳首策漢

家西域慣求和

昭節見過感贈

愛汝由童稚愁予忽暮年一貧何至此相對兩茫然春酒
歸元亮寒裘欺樂天廣南烽未息哀雁叫江煙

江漲日退獨酌書懷屬諸子共和之

道豈河源望不窮心非山徑用常通百花開落經春後一
水盈虛了夢中僕慙立辭生客帖兒嬌追覓暮蟬風瓜蔬
肥脆魚蝦賤重醞頻斟作醉翁

復用前韻和諸子之作

浮雲不定達兼窮眞性何知介與通籌補神倉貞賦外夢
懸仙仗塞垣中佩牛帶犢非今日蒲酒蘭湯尙古風樂且

絃歌遠來友分無勳業一衰翁

輪生有削草藏蓄之句起予復和

憂端一發遂無窮讀易粗知象數通
竟陸齊生三月後包瓜剛繫五陽中
愧居夏屋過餘日擬汎虛舟任景風
整頓乾坤豪俊事披裘垂釣有漁翁

辛酉五月四日作

老依田里遇非窮遙望京華信未通
三藥何年苞海外六軍明日節天中
北窗涼到排山雨西潦聲兼逆水風
國恥民勞今古恨此身無病也成翁

劉觀察枉札以書數種餽節越日得京信補授惠潮

嘉道計當啓行西征次韻

承家節操一錢窮範世規模六籍通龍劍氣騰霄漢上虎
頭才竭指揮中卽聞東路歌來暮先定江西播好風交鳳
友鴻聲應速端溪卻愛信天翁

梅士遠致萬壽藤杜鰲物興懷疊韻卻寄六月六日

昔夢羅浮日未窮今來一杖兩山通何期白鶴飛觴後

戊午

九月同諸公白鶴觀登高遇梅士攜酒豐湖

又見黃龍入手中

藤產黃龍洞

廣院扶

看深夜月崧臺卓立滿江風百年榮落登科記正直終當

表若翁

令叔雲衢先生

端城息警贈邱粹菴

百花誰遣亂中開可是春風散悶來獸跡長連龍子嶺

賊由

四會直通郡城

羽書頻送越王臺孤城從事輸肝膽幾輩憂時出

草萊獨惜有家無四壁松楸興感爲君哀

粹菴自撫州歸
葬母賃屋以居

舟興

日邊時復夢乘舟欲挂雲帆不自由芳草無情人悵別落花何意鳥遲留向傳老驥輕千里今苦清波託一鷗羣盜縱橫生事阻春連兵氣冷於秋

重有感

漢家遺恨極西邊神爵軍威雪恥年豈謂犬羊能攪海翻隨蛟蜃禍滔天金甌只仗黎民保玉斧無將赤縣捐在昔木蘭巡狩地誰論黃屋幸澶淵

申甫太守邀集七星巖醉中口占

石室寒煙待客閑星君許我夢頻來相逢不問人間世萬

清歸酒一杯

玉堂譜忝七科前回首金門意惘然聞道天津氛祲沒知誰生面盡殘煙

九日登圭頂山閣

五管雲山勢欲東天開雙峽控當中長林已變深秋色高閣初憑萬里風正得逍遙忘日暮何因執掌觸途窮

國練籌餉

經年

西江入廣潮歸海幾見書生戰伐功

劉觀察梧州書卻寄

蒼梧千里豁秋陰忽聽扶風越石吟水閣張軍須勁利火
山連陣轉蕭森長征易盡驂騑力安處難爲燕雀心濁酒
杯停愁未遣適從圭頂罷登臨

第三姪元瑞壬寅生少得虎名庚申冬領縣解入府
學望其遠到恐其彊直任性不達世務抒吾感遇
因以勸之

梅花香暖透春風爆竹聲歡貼報紅郡學再傳儒有術鄉
關三載事無功未除儼狃憂京邑徒想皋陶飲泮宮慶榜
頻開名額賡時危幾見出羣雄

萬里青雲只歷階金門回首悵無涯自知衰朽難爲用欲
答昇平恐不諧如虎正須剛氣伏飛鴉猶念好音懷教
忠堂構千秋業在汝心源養寸莖

向樓

春氣極天浮從何賦遠遊桂源奇秀得獨倚闌江樓

壬戌三月椒生奉 命入都卽事叙別

端溪重到故情伸看我年年白髮新
籌筆媿從花縣事乘時好變柏臺春
騶虞似猛無傷物駿馬常驕不護身
糾別賢能天下望格苗干羽展經綸

大良題陳元孝先生像椒生書之

昔誦君詩屈梁讓奇逐日之氣填海之思
今拜君像虬髯倜儻繼絕簪纓遺佚草莽
才彰厥德生不變塞相鳥巢南從星拱北
雪聲悽悽室毀安歸聽劍神寂懷玉知希

蔣湘泉由廣西赴浙藩任訪余三水舟次復申贊謁

固辭不獲勉贈長句

名將東吳起蔣欽妖氛掃淨粵西岑叩囊不問全身道折

節惟輸救世心自視五羊成棄物誰稱一鶚有遺音詩書
義府言無易要術須從左氏尋

鄉試揭曉元瑞以官卷中式憶嘉慶壬申余年十三
應歲考堂前桂始華一枝辦大如金菊摘供瓶中
先君子謂學行根深當如是不爲異故末句有及
少年我亦喜登科功業無成奈老何 恩典卽今延世重
賓興從古得人多末流標榜龍門價大道防維鹿野歌瑞
桂香飄彝訓著厚培根本眎庭柯

移居城北忠勇坊

買宅欣逢應 召時講堂齊獻茗成詞太沖自得巢林意
人境仙居漠不知

寄輓賴榴海

昔醉旗臺酒時吟寶劍篇尋僧百花裏識我卅年前

道光壬辰

寓都門玉極菴

暮景將遊嶽驚波忽逝川平生豪宕意付與後人

傳

二子從余遊遺稿多未刊云

憶故友黎孝廉超民

九原賻恨自春闈屢屈科名抱玉歸經世最知農事重起

家深惜宦情非

畫牛見贈
恥言捐官

白雲松徑防災燄碧海桑田伏

殺機遠慮都從身後驗觸君遺墨涕沾衣

守柔齋癸亥北遊草卷三

高要蘇廷魁德輔著

受業

蔣元達霞舫士全校

北江口辭諸生遠送舍弟同返端州

豫章挺山澤榛樵與爲鄰芳園有松柏亦同桃李春旣籍
明堂材翦伐傷天真棲棲營中興耕耨譏問津硜硜避世
士安能爲達人石室樹三花鳴鳥思其羣風雅重圭璧追
琢日以新時來經術貴周行爲我陳

宇內遊百族一無輕別離渾渾三江水朝宗知所歸生當
治亂間出處齊安危成名視夙志寸地天可躋努力及少
壯悔我老學遲巖廊與邱壑天均心自知飲餞駐方舟歡
樂隨鳬鷺迴帆悵日暮崇德無窮期

奉寄姚徵君承輿寓陸生維垣舍館

昔聞有神交未見己心許知君重名實道器通今古適從
河漢來遠遊相九土東南已瓜裂西北猶箕聚威望屬儒
將精忠勵師武機多寇應滅餉乏軍速撫砭灸不憚煩風
痺或能舉時乎竟相失老矣亦奚補無由洩孤憤尙慎思
所主塗長百周折坐久一頓吐謂我義當行致身功可敘
紫微值星次黃氣見眉宇載聽出谷聲遂貽辨方知卜我
崧臺宅送我長溪渚依依朝至暮悠悠默還語欲往畏友
朋將飛視毛羽敢忘松筠志恐負煙霞侶潮歸報初程春
去醉佳醕百年良易盡四方不遑處君看高峽雲若爲泰
山雨

過峽山寺

雲影開中宿江流蕩夕暉緯垂青嶂轉渠急白鷗飛破院
餘松棟窮僧有草衣卅年來往熟幾見

白廟舟次得南海孔生廣陶書專 至學海堂尋
餞圖詩卻寄二首

若翁玉堂彥介石知吉幾權門禮羅 羽已歸飛一室
富文史迹往今留輝愛子夙 少 雲錦機冬葛苦孤
露母賢終得依督課北堂側背面常歔歛乞余題墓門陟
此悽爾思天駒志千里樂受九方羈達材不由學本撥解
榮枝索居日以遠無忘憂患時

丁巳別羊城城南氣凋喪藏書十萬卷高樓幸無恙灰燼

委金玉彼富業空創造化許誰料苑枯乃心狀名成善所
積醇飲家自饒饒我學海棠紅棉照碧嶂嚶嚶鳥求友高
言導羣唱畫史老解事景物昭大壯不圖得斯樂無乃山
靈賦寄聲中宿潮心隨鴈北鄉

碧落洞

俗名觀音巖

窈窕溪山接舟行詠到難春風吹紫翠絕景表高寒天半
虛明戶竇中自在觀金書誇僞漢那得野人丹

曲江舟興二首寄邑里游舊

南越天開壯北門地稱韶石古風存羣山送客春宜笑二
水離鄉夜覺喧唐宋往時論事業張余何處問田園翹翹
車乘垂垂老小草難酬雨露恩

昌訪圖經髮未斑今逢佳處阻登攀
鷓鴣臨水啼何急翡翠藏煙意自閒
妙蹟空傳天慶觀勝遊遙指月華山
巋然風憲西樓立景仰濂溪欲叩關

風憲坊光風霽月之樓卽城門之西樓也

韶州報謁方觀察賦別二首兼呈何子貞

嶺徼烽炎海瘴寒
弦歌劍佩置身難
林居漫領三山長

朝命重徵五品官
平世簫韶懷故蹟
春風繡斧結新歡
駐

舟不爲貪程去雲錦千機且縱觀

出示詩集六卷

張王樂府發高歌
目斷江南恨若何
爲數班聯傳客老得

紆簪策羨君多
風雲氣短成三仕
師友源長到六科
雙闕

浮空猿鳥嘯會當觴次憶東坡

君同出何文安公門先後十年同官職子貞將復過

此致語九成臺下共仰之

樂昌阻水梁葉二生邀遊仙人石室

靈君得名山據彼頂上池

樂昌山水見舊經

蒼潤太古石仙人隱

於斯我行阻瀧水恐或仙靈知西郊五里近須友前探奇
白日飛蝙蝠黥洞伏蛟螭中有窈冥門問諸混沌司來遊
後陸羽爲致仙人辭超絕廣成子蹶起黃帝師抱神澄一
源斂福敷百爲憫今天下溺濟此黎民飢正直果投好身
形安敢私長嘯且歸休送我泐溪湄

贈葉品三司馬

山抱樂昌城靈溪武水清官知春布澤民誦夏祈晴仙室

虛牀臼茶神烈姓名

城西崖有陸羽題名

何如懸磬石能召鳳凰聲

昌山有樂石土人取爲懸磬見九域志

行館述話

北江景物曲江誇醪飲江樓笑語譁筋竹直能高十丈老
榕常足蔭三家向無大役兵傳箭近得多金客運茶迴憶
廣南全盛日村村瓜果四時花

鄧公祠

公名文進始興人唐初刺史拒蕭銑固守樂昌城

大義當強敵英名溢水西

公移州治於水西

會喧行旅賽堂肅後

昆躋往歲停簫管山城閉鼓鼙誰知般闌策募勇始興溪
何無忌拒盧循般闌與書曰始興溪子拳勇善戰

瀧船婦

十日江頭坐一朝瀧裏行領符看客謹把舵試身輕飽可
桃花飯分疑玉糝羹不知春夢媼富貴若爲情

藍豪山避雨

九轉龍逾險容刀石不平虬龍雲變色鷺鶴水飛聲問路
鄉關遠忘家海宇清鬱然逢吏對北上勝南行葉司馬遣吏護行

龍頭韓文公廟主廟者僧

周季天下溺孟子正人心論功等大禹昌黎振儒林推尊孟子功不在禹下自公始一疏佛徒服元和稱到今嶺南有遺澤悠悠龍
小深

馬伏波廟

晚成功烈壯征蠻鑿鑠精靈不可攀龍水武陵遺澤遠

松何德配梁山

武陵梁山有廟祀梁松見廣宇記

朝飲黃精酒登崖縱步

山涉乳源西微行襯綠萐松濤天外落板屋澗邊棲我僕
能扶醉邨氓願與齊路難行且止耳畔子規嘯

平石入宜章界

夾水分隄石青紅疊疊平地留秦塞壘人雜廣州聲萍雨
三篙漲楚辭天問篇萍號起雨漁燈半夜明鷓鴣安逸意不信有鵬
程

宜章麻令維緒訪余行館越日再至夜分始別嘗受
學於孫學士蔣編修余門下士也喜其禮恭言質
壯歲幹練將備世用不爲私幸詩以贈之

列樹東西嶂分秧上下田民勞唯望歲官好卽生天試手
饑兼疫憂心法應權兵符朝暮詰飛輓樂昌船

去歲救荒告糴於粵

聞說麻叅府宣威楚塞年殺降同將令食報在書田

太翁官湖

南屢立戰功淨止羅我重遊老知君繼世賢淵源欣有

自集媿小斜川

詢及兒輩尚未成名

度嶺宿郴州

肩輿入楚南雨過綠稠疊問途百餘里列肆遙相接笠影
日正中雲谷嶺如摺鹽茶此轉運人驟若爭捷忽覩繡壤
平小憩衆聲響行歌出墟市炊煙隱城堞景物秦漢遺趨
程目漫涉圖畫指湘湖渺渺懷舟楫

思家謠

家居不爲樂客行何思家謂我老將至愛食忤其牙憂我
勞耳目誤作少年誇聰明十分到見聞百倍加繕性無小

補浮生終有涯暖暖石中玉豔豔風前花猛省別時語
處纖爪爬守一屏羣妄歸愚返自崖

蘇仙山

桂陽郡古地圖寬遙引衡雲石上蟠熱水寒泉通變化烏
龍白騎恣遊觀桃花自有湯宜浴橘葉誰知井是丹訪得
吾宗仙子跡不逢真侶上昇難

義帝廟

通鑑略云項羽陽尊懷王爲義帝徙都郴

黔中分割僻南州帝者陽尊據上游國有重瞳偏負楚天
生隆準爲興劉難臣亞父龍應困能將真王鹿已收罪定
都郴嚴斧鉞可無通鑑繼春秋

哭司徒方伯

照靈櫬歸粵適遇於郴

一瀉長河淚他鄉見輓車悲來千里遠苦別十年餘古蹟
思歸鶴行厨薦熟魚世情雲起滅死友痛何如

館人夜談錄其異者

嶺北嶽崎處驚奇證舊聞岡頭驟踏虎峒裏鼠爲獺窮水
歸沙寨貪泉似石門更饒靈壽杖長短待人分

駁船至瓦窰坪

郴水趨郴口淵洞不計程草織蒙石秀潦急帶沙清轉眄
黃岑隱從流白鳥輕瞥過高岸側巨舸笑相迎

金獅巖

貪勝忘衰齒乘流且忍饒仙蹤違馬嶺怪石覩獅巖景近
偏難狀崖平向未饒醉來醺醺酒謬署散仙銜

郴有酒官水舊名醺

醴

觀音巖登最高閣

在永興縣

寶陀南望思飄然便水安陵好繫船印合英州蓮座語心如明月正中天

耒陽夕望

雲蓋峯長暗舟行四月寒見虹占雨霽飛鷺覺身乾地
秦餘縣才名漢季官臥龍當國日思得鳳雛難

羅含碑

君章文采秀湘中卻讓桓溫品藻工就宿羞攀兵子語
巴如未識英雄

杜甫墓

風騷無主正聲沈白雪陽春絕賞音掘破孤墳生大雅誰知裴說救時心

新城街

街指新城是故城衡陽通郭開昇平三湘子弟從軍樂不

怕山頭石鼓鳴

臨蒸石鼓鳴則有兵革之事見水經注

紙神

數錢西邸潤天垣末造炎靈日月昏偏有蔡倫池水潔紙莊尸祝小黃門

伊山

世傳爲桓伊書室

耒陽書室載衡陽兩地爭留一字香貝錦不成絲竹恨使君高誼故難忘

晴發書懷

經世無奇策虛名乃吾病百憂迫衰齡萬里赴恩命
見東日曜卻逢北風盛順流帆臥檣逐潦柁操柄林迴
延賞雲奔條相映豈少桑榆樂恐移剛直性暇逸友知非
驅馳天使併况聞涉川誥敢忘在舟詠乾坤浩包荒春秋
大居正漢廷典屬國審時慎更令豺狼獵吳越滇黔弋梟
獍捷誇陝南奮寇遏花門勁及茲昧乘危往者竊從政勞
勞瀨尾魴日望河如鏡

寄題衡嶽二首

神秀標南極中峯氣象殊視融最高百靈尊帝子萬古對天樞
蒸穴龍常有見吳都賦棲巖虎若無衡人不傷人炎方衰敝俗歎

吸待昭蘇

朱鳥知來客風塵負薜蘿
魏韜韓愈筆愁和屈原歌
暮景難安枕妖纏未息戈
恤鄰吳越近爲禱楚材多
近得江浙消息故章末有及

長沙別周太常起濱

南岸帆收夕照明西門傳柝報關城
江湖白鳥知多少飛近長沙爲避兵

諸將榮華甲第高

天書石屋客思陶

太常寓陶文毅公宅青

衿莫倚封侯話文學儒林待爾曹

大唐文學儒林碑在衡州

扁擔峽

峯紆青紫夕陽銜波上涼侵白葛衫
適與我心成大願江

風分給往來帆

入洞庭湖信宿阻風

湖漲楚天蒙
維舟草石中
三湘迴夜雨
五月還寒風
鼉響沙洲斷
龍吟洞穴通
夢乘銀漢上
初日正生東

望南湖懷李白

千古詩人李
謫仙將船買
酒白雲邊
東坡卻有岷
峨興未信
康時屬老年

端午日寄舍弟廷鈞

每涉波濤感
靡依行逢忌
日淚霑衣遙
知棣鄂相望
處不慕高官
祝早歸

洞庭九山詩

并序

洞庭以水雄而勝迹在山洞庭湖志誌山六十有四攬其尤異得絕句九首義兼比興亦或有爲而作命曰洞庭九山詩君山唐宋多名篇再過不能遊蓋與山名有緣相左故闕如也

磊石山

一名龍壽山高踞全湖望周萬頃

湘東標望水漫漫湖海今思砥柱難誰使漢陽番舶入至驚龍壽恨狂瀾

鹿角山

洞庭廟最靈舟過必祭

洞庭如鼎列神姦仙馭臨觀萬古閒疑是楚軍鏖戰血鴉飛斜避石痕殷

五代楚將許德勳追冷業至此山

九龜山

柳琮記僧無相居處

禪悅空空不著思隨緣棲息固靈基有僧無相誰知識笑

問南津指九龜

山在南
津港口

酒香山

漢武帝求
仙酒處

神仙不死酒何關謫諫從容妙轉圜樂大無言臣朔醉酒
香香溢有緣山

禹山

上有禹廟南有石門山相傳禹
所鑿洞庭門戶下有羅帳山

手把龍威金玉編溝雲漁夢水成田石爲門戶施羅帳儉
德卑宮未建前

宋田山

後梁胡僧祐陸法和
討侯景將任約於此

赤沙湖上赤亭城險握三湘狗子驚

狗子侯
景小名

漫說巴張擒

健將餘憑刺豈縱神兵

墨山

產雲母石可爲屏上有神祠龍開河達其下

墨翁超悟墨磨人墨自成山不庇身河仗龍開雲母鑿空

留懸洞世稱神

山又名懸石有大小懸洞

稗牛山

在龍陽縣西陽雜俎山有青草槐叢生高尺許花若金燈仲夏花發一本可值千金

好奇成式表奇花合置龍陽倭倖家俗豔未經仙子賞瑤

臺靈品阿誰誇

蘭嘴山

舊建洞庭水師營

舵桿洲臺萬世功威收三楚大王風昔稱蘭嘴軍營壯今

掩蘆林水寨雄

舵桿洲石臺創建於雍正十二年

泊岳陽

沁園春色滿腔浮誤逐邯鄲夢裏遊恐遇真仙厭凡骨卅

年重過不登樓

新堤

西潦南風送客舟
帆開已隱岳陽樓
急於九月蓼花水
暫過新堤楊葉洲

望西山

樊口西山九曲幽
松林夾道暑成秋
招涼欲訪東坡迹
難得居停鄧聖求

武昌雜詠四首

子胥解劍記蘆洲
洲徙蘆枯恨未休
叛楚忠吳成底事
可憐漁父爲沈舟

東吳名將甘興霸
錦幔收時已致身
爭似戴淵風致別
江

湖改節拜文人

絕倫清操自逃名權勢何由駕馭卿才數孟嘉遺孟陋
家人物問淵明

次山知已有三殊亭復名殊令也孤鴻往燕來南北客誰
遊退谷泛杯湖

孟宗宅

委官恭武免嚴科德徹幽明石不磨莫話城南靈竹院從
戎墨經薦章多

漢口夜望

江漲連雲夢三山影不流荆吳形勝地燈火出夷樓
人指伏龍橋許仙逐蛟處海市偈西州誰驅妖蜮去

鄉人譚守庸李錦生餽鱗魚苦瓜

甘竹灘頭魚最鮮西園瓜好不論錢故鄉風味擦離緒卻
詠驪駒願執鞭

鄂渚發船歌

不登黃鶴樓不宿鸚鵡洲神仙才子老無與昨夢鳳凰山
上遊精兵強弩半天下琳琅英秀歸皇州金城一失楚肩
背石磯重碎吳心喉往者忽忽來者憂青雲北望紫微近
漢水揚舫趨上流

寄象州鄭比部獻甫北遊草

一出乘舟難頗憂滿太湖

洞庭亦名太湖

賞音當世失知己後人

無五管客懷寶

三朝匿守愚越華歸興決別憶野踟躕

分水嘴觀競渡

飛鳧水馬往來輕俗愛屈原無盡情斜日落帆分水嘴村

妝紅綠映波明

荆楚歲時記既望復出謂之大十五殆是南鄉遺風

沙洋卽事

荆門分州駐此

金鼓沙洋震歡騰第一關將軍今犒士已定綠林山

荆門紀勝八首

涿川紫岫豔花陂石隱偏稱洗耳溪帝世能容巢許輩已

登元愷活羣黎

蒙泉分作惠泉流百產資生楚上游何事衛公嫌太潔

寒無數澤難周

潛玉亭銘抱玉巖塵中寶氣鬱巉巖若知天命歸秦漢太

璞能完更不凡

青溪匿跡世無求
鬼谷先生石室幽
輕授陰符成詭御
儀秦汙了道家流

英靈顯烈祀當陽
馬洞花溪記亦香
益德橫矛櫟林坂
曹瞞威挫爲關張

紅巾妖燄煽荆蠻
籌餉新添大小關
五鳳八龍應見野
虎牙狼尾莫名山

館閣同遊羨二孫
東山堂廢斷碑存
宋朝儒術追洙泗
不薄長林出狀元

子方清節逮康侯
漳有唐胡冠衆流
標榜孟亭詩句好
何如諫草傳春秋

聞蟬

荔支時節憶家園
家食無田等有田
日晚扁舟衣汗濕
撚鬚霜落聽鳴蟬

酒船

宜城喚酒客初嘗
不及陳村大糯漿
少女窺閒迎笑語
爺從三月已離鄉

安陸夜泊三首

石城白雪樓臨漢江今去江岸十里

白雪郢中樓歌聞白雪
不微吟明月上清興
漢江流陵谷何時變
干戈有日休黃華
同一笑還與石城游

樂志沿唐有莫愁
石城從此擅風流
誰知地險因天造
沔北江東一要州

曲高和寡宋僧遊四海無人意寂寥錯認荆公誇獨唱聲
香白雪爲青苗

望大湖二首

仙宮鶴觀列塵寰縱我能遊亦等閒落落乾坤挺孤秀衆
山蒼藹大洪山

帶甲千僧保上方紹興監寺錄勤王如何皇覺妖書出燬
盡前朝大道場

大堤舟夜

楚驛舟行盡深宵興尙賒天低蟠冢水風起白河沙愛鶴
思羊祜仇覽視鄧遐仁賢千古意冠蓋記誰家

顏提戎相延聞余來歎禮逾分歡若敦素奉贈長句

天府鍾才第一流韜鈴多出老楊侯

忠武公

川中聽取端人

重楚北能分相國憂魏我虛名宜束閣感君高誼問行舟

防身長劍成何用憑仗平安報廣州

君與濟協戎善

襄陽懷古十首

呼鷹時唱野鷹來笑倒東坡不上臺溪躍的顛龍友失眠
中神駿恐非才

龐公冰鑑傳司馬物色英雄角立秋如使景升能得士桓
文盛業在荊州

三顧親逢一德時君臣魚水志無疑草廬籌定偏安局日
月爭光表出師

杜父聲名溢漢東平吳勝算出羊公沈碑爲止襄人淚想

得征南讓首功

衣冠經術有淵源
滄海橫流志節存
報漢直同潘濬
訣零

陵都尉習侯孫

習珍

朱序名垂賴母賢
夫人城築禦秦年
攜家自撤東吳禁
女婢同仇世罕傳

七十賢良宰相才
虞淵捧日上天來
神龍若具梁公眼
枕肉何留禍再胎

耆舊多賢最許誰
天庥國瑞至今思
一門四孝三唐冠
况

有張公爲立碑

唐旌表尹孝子碑張柬之文

軍戎萬里竟知情
計出書生帝大驚
人面獸心憂未了
撫

夷宜鑒吐蕃盟

柳渾

勝迹登臨逸興生新詩難繼昔賢聲高陽池酒銅鞮曲來
自天南無此情

樊城大雨

五月廿六日夜

漢襄捲瀉雲雷馳曹家七軍遺魄悲樊城一夜天如墨想
見虎臣威震時南陽伏龍萬乘師雨晴訪古隆中祠江頭
西望忽大笑樹石今多羊杜碑

守柔齋續集適豫草卷四

同治二年十月六日出京

高要蘇廷魁德輔著

受業

蔣達霞助
梁元桂鑒士

全校

酬別王太常定甫

青雲往溯十年情
白髮還親異姓兄
金石交期歸大雅
車弓故事惜虛聲
行思嵩少三花樹
夢和皇州百轉鶯
曠世龍門傳汲鄭
何妨宦拙共爲卿

定甫攜示梅伯言避亂草感賦

宛陵文筆競廬陵
今代詩孫獨擅能
風景山河終不別
乾坤禍福豈無憑
若論名士誰低首
猶得同時我服膺
憶自湘帆歡會日

馬君沅亦辛巳同歲生

遺編淚漬痛層層

題橋亭

蘆溝橋遞涿州橋一宿寒增雪點飄正好夕陽途復遠鳳城回首隔層霄

北河

暑雨郵程記昔經南行瞥見北河冰牛羊野警風塵色爾牧年衰恐不勝

彰德北門小憩

樓額曰瞻天尺五

寒擁氊裘入相州瞻天尺五問危樓自來天上青雲客誰愛韓家老圃秋

望蘇門懷孫徵君鍾元先生

百泉風月主蘇門遠過河汾盛業存天相儒宗承五子世稱家範及重孫田廬不惜滄桑改溝壑何期俎豆尊

睢州香一瓣竊攀高足識淵源

湯陰拜岳武穆廟觀王行書謝朓詩真蹟

岳家聲勢懾強金憤指黃龍恨轉深佳士南歸天有意將
軍北伐帝無心徒傳故國多靈顯忍見神州竟陸沈自古
江流悲不盡何因詞翰結知音

洙曲道旁碑呂文穆養晦處

鳳翔千仞羽毛奇一泊平林百鳥疑骨肉匡章原異跡風
塵趙晉不同時觀燈偏恤飢寒狀卻鏡還傳直婉詞金匱
盟渝終古恨承家有姪繫人思

抵許州明日雪寄都門游舊

十一月十七日

西鄙愁烽火東皇念室家命懸來歲麥春動半天花照影

星星鬢流聲樹樹鴉此間清意味敢望玉京誇

僧王部下副都統善慶來許相見有述

頭品頂戴黑龍江人

暮景參軍事清晨報客來習聞談虎色猛想縛龍才

縛龍巴圖魯

魯載熙朝新語

頭品年華盛心期露布催明朝日長至雲物候登

臺

移寓州署西園偶題

幕府朝趨禮數殊軍謀吏計一吹竽淮陽許臥恩非薄瓠
子難防澤尙需僕有歸心忘啓處馬餘高骨憚馳驅桃花
潭館青竹看客崔隤似我無

馮展雲宮詹過許州爲留一宿卽事贈行

昔從山左枉星輶秋盡明湖木葉凋歡憶重親過逆旅別

驚十載話寒宵風塵傍老官程迫梅柳先春故國遙歸興
踟躕天北望五雲多處不同朝

與友人論學

鳳麟白鹿瑞爲圖壽世何如道術儒曼衍莊生雄說劍湛
深揚子美藏珠德星亭古名猶盛曲水園荒興已無方寸
蘊靈維嶽峻好沿伊洛闢修塗

沈孝廉用增投贈佳篇漫酬四韻

戎馬冰霜地書生氣不寒晝明宜雀噪冬蟄可龍蟠盛業
千秋決浮名一第難陽和迴北陸楚畹正滋蘭

丁儉卿七旬學易圖令子頤伯侍御請題

達人常樂志憂患有時撓端居味無極夜氣旦逾清林木

挺修幹瑟瑟秋風生階庭蘭玉叢神怡天所榮嗟予老務
學三仕蒙虛聲披圖羨同歲山陽千載名

倪海槎琴餘相鶴圖

黃鶴高飛弄紫煙何當塵土舞君前東坡方袖南風手夢
侍虞廷奏五絃

管幼安渡海圖

費亭侯偪許昌都士去遼東漢已無萬古綱常遺此老當
時禮樂任諸儒聰明誤入乾坤毀光耀嘗存日月孤孰解
神龍偏見尾海波如鏡客浮桴

讀上蔡張仲誠先生遺書柬聚星書院張山長

落溪

直揭生安學遊梁道在茲有爲根性命無事涉高奇風雨

天中會圖書日用知聚星欣講習卽次不前期

雪曉四首

十二月
既望

寒雲幕大地積素無污邪仙鶴千百羣朝散玉皇家遙林
引旌旆冉冉垂絛禬南望白草原北顧曲水涯唐宋幾陳
迹視此空際花西湖起坡顙煎我羅浮茶

我從大梁來黃塵擁郵輶一夜東北風化作瓊瑤屑八龍
昔遊處玉帳牙旗列破蔡有成算西鄙掃狐穴遠愧從事
愈軍儲月供竊獨處且觀心飲冰亦徒潔

顏淵耕負郭所樂宗聖人孟軻謝官守尙志屬天民簡書
限期會服義輕吾身今居雪滿庭昔行暑如焚悔當授經
日俎豆徒莘莘奚不學軍旅乘時立高勳

使君愛敬客適館油蓋張久宦急民事三白天降康佩牛
帶犢子過境如飛蝗瘡痍尙在眼東餒憂中腸彬彬潁川
族太邱誦清芳政成不爲宴集霽意何長

雪中讀易興至輒書寄蔣編修

達孫學士

鏘鳴

易象表元氣龍行與天周墮地身卽危故爲君子謀乾乾
以終日向夕猶懷憂乃知孔門學跬步防悔尤乘時澤四
海潛躍志無求諸萬人中龍謹慎垂千秋

鵬冠道家雄王鈇善言政信爲國之寶法亦天所命舍信
而棄法太阿失其柄同人割私係水流不反令棟隆得良
輔連雲翼然正工師曰求材未聞空谷詠

廣庭突峰巒積雪俄以爲崇高在人意富貴安知危兒童

一相靳踞地雄狻猊手墨上顏面冠玉呼蒙俱方寸山海
藏變態神莫窺敬共百邪懾君子慎其儀

天馬飢不鳴芻投避羣齧化爭率以讓旅處亦安節嵩嶽
載坤腹卑之一邱垤邑國治其私四鄰望無缺抑戒老逾
厲容容躬自閭振鷺舞蹕躔雖童掃行雪

微禽乏六翮性適桑柘宜牛羊蠶兩角臧獲能驅之逸才
慕豹隱騷士從鳳嬉鴻鈞一毛裏保合齊庸奇吾愛無名
公神化天與幾寓形安樂地如在羲皇時

當暑欲招涼苦寒卻思熱人心起叢幻惟皇受謗缺健行
率常軌萬古猶一瞥歲晏高陽里坐玩三日雪靈府豁昏
翳竹柏共怡悅復禮天下歸何資虛白說

謝太傅圍碁圖

陰陽迭消長運會有窮通古來賢達士濟物無全功東山別絲竹燕笑逢郝隆遠志爲小草庾謵滑稽雄罷碁捷淝水聲名震秦中知幾謝圭組冥冥天際鴻

牛車吟沙河道上書所見寄倪海槎

牛車載芻豆跋沙石硯硯顧主亦自謀健步隨輻旁向晚陰以雨絕險踰崇岡不受呼叱詞小忿成參商爾輔力已致棄之恐不祥病賢有如此行路心憂傷

南箕

伐木掎其巔析薪順其理微物惜挫折觀閔多君子南箕向北斗兩舌哆而侈耿耿朱鳥咮申辨奚由爾靈均不去

芝四方靡所止翰飛仰雕蒿淵潛俯鱸鮓

聞鄰舍兒誦皇皇者華

羣雛學永言和聲咨復咨得失詢所親民隱天聽之樂章
著忠信光華義在茲燕饗復勞來懷歸恤其私北門歎交
謫緬想周盛時醉飽自鳴豫安用使臣爲

六安牧何君

家驥

擢守徽州士民請留於曾節相嗟

乎東南喪亂已來守土如何君集流亡遏寇虐民
方飢得哺皇皇然恐其去也節相不以例格達於
政哉代州民言俟採風者陳之

新安望新守苦被六安留問民守何親與民誓同仇狐兎
躡江北豺虎穴壽州圍城慘風雨日夜無時休神聽福君

子賊退桑鳴鳩邦人未喘息勞我使君謀

廟堂眷良牧少紓南顧憂相公曷私我淮海揚歌謳

張蓉溪餽歲詩以酬之

許國來遊晚相逢古處敦名家忘鼎食中饋致盤飧世事
從何說鄉風賴此存桐城兵燹後珍重次公孫

除夕懷楊鐵臣觀察

殘臘春歸日中州雪霽時懷都當別歲征邑尙行師天竹
明如照唐花冷不知河東朋翰盛應動故人思

甲子歲朝作

老得天中氣陽回海內春千戈何日息甲子上元新在野
鷹思塞歸閑馬待人功名輕柱史未退是誰身

雜興

桑者鹿門隱耕者去隆中保身自明哲濟世歸英雄大蹇
朋方來心誠道布公重哉天下任戮力阿衡同炎靈不再
興何有雲臺功逢時事高尚且讓羊裘翁

入關鼎初定血氣已同倫荒遠九州外海島各君民受生
戴天共非種情何親豈謂屈倉頡強效蟲鳥文適齊習楚
語飲食不能分一炬燎紅毛庶拯雲雷屯

翩翩鄭公孫知足乃歸邑家範貴能貧敬戒所當執居今
祿不世水衡缺齊給里諺交官窮求責何由及貧緣致多
藏周親薄周急但聞黃鳥歌不逢白駒繫

開歲九日雪寄尹性龍觀察

雀噪披衣起春光一望賒柳驚天外絮梅憶嶺南花作宦
如流寓觀民未放衙大軍臨汝水有衆各憂家

喜雪

邸報
祈雪

高殿誠祈切明明率育貽中原成沃野四海是清時春事
風將信天心草與知夜來歸夢熟望杏已東菑

葉硯農宰孟縣曩嘗攝篆許州聞余寓州之平園因

公來見述舊有贈

輿誦金湯績輜軒入聽新

紀庚申
守城事

相看成老大衆愛出風

塵掌得明珠報心推赤子親

少君生
于州署

河陽花繞郭不掩吏

清貧

雜詩

至人攬元化金鏡隱光耀
姪妍自呈露風聲出虛竅
火明日正中善惡無逃照
汝南詔月旦能使奸雄笑
如何棄蜀傳墳笈不同調
阮籍悵途窮孫登但長嘯

寄舍弟

西湖亭畔戲羣鴉春草初生客憶家
昨夢扁舟迎笑語長溪開徧木棉花

誨從者

省過不喜諛立命不祈福
神人澹相與寤寐安我獨
春氣
萬物得時育松柏非表異
本無蒲柳綠農家正舉
置官倉計輸粟風歌鵠在梁
念茲愧食肉

黃次玉判許州以鄉先生羅子一貫編見質題詩復

之

陽明妙悟二溪傳經世當推一貫編甯國東昌民悅服官
同赤子本天全

宗社人心政本先致君堯舜責經筵華亭深契江陵嫉謝
卻公卿取聖賢

程刺史遵道屢貺佳作率酬四韻

新安山水見才奇投筆戎軒坎軻時盡室驚從多難過中
州喜與聚賢期風聞寇至河魚疾雪阻春來社燕遲南土
安危天下望登樓偏觸浣花詩

讀曹靖修集贈王學正驤衢

理學開明代中州有月川儒冠誰比重夜燭自堪傳防弊

標狂簡成功本靜專上官知敬禮懷古望時賢

司開先孝廉年少從戎以詩來謁感興和之

儒業承三世才名擢乙科雪餘來往少星聚見聞多宗慤
輕投筆劉琨奮枕戈惟余遲暮景洛學喜觀摩

贈別張蓉溪

篤志師曾子萍蹤得素心艱虞將母樂樹立自天深春判
鶯流語寒過鶴處陰皖南明德後四海幾知音

八里橋

赤帝靈呵赤兔馳曹劉交絕在斯時奸雄度量將軍義不
到華容事豈知

道上口號

潁谷指襄城春風自送迎市廛安樂語官到喜無兵

發汝州宿襄城

雲色開嵩麓晴光接首山往來襄野外詢度汝墳間向爲
空言惜今知重負艱中原初著手欲挽古風還

行館示屬吏

陽晝薄陽橋子賤知君子嘉魚樂與賢誦詩通治理蘇門
九十叟素志希天起湯公任興學兩河好風被明堂計榷
枏芳園炫桃李但愛弦歌聲未若得人喜

吾

師賡堂先生蓄道德能文章負海內重望作詩乃餘事其
守柔齋初集三卷刻於道光中年早不脛而走矣先生
自通籍厯官翰林御史慨然以天下爲己任於詩乃絕少
作咸豐間再以憂去其官山中堅臥至十餘載同治建元
始以徵起純粹之躬老而益壯卽詩亦然癸亥抵京師出
近所作屬之達同歲生王定甫奉常校而敘之達等以爲
當付梨棗先生重違所請許焉其時己有觀察河南之
行明年晉位方伯而詩刻京師適竣工達等又以初刻本
不存京師復與定甫重加讎訂彙之剞劂於是先生之
詩合成此集爲八卷西湖百詠原附初刻今仍其舊嗣是

先生敷歷中外政餘所作正未有艾當以次而續焉至其詩之高深則當世有定論傳諸後禩亦必有能知者無俟達之贊辭校刊之役同門梁馨士儀部力尤多達從其後例得並書用誌歲月時同治三年甲子九月也門下士灌陽蔣達謹跋